

Ins tschertga vaiders da conservas

In'exposiziun insolita per egls e palat

DA GUIU SOBIELA-CAANITZ

■ **L'artist Max Bottini (Üsslingen/TG) tschertga milli vaiders da conservas.** Per in project dal Museum chantunal d'art da Turgovia en la chartusa veglia d'Ittingen basegna'l aliments sterilisads, uschè blers sco pussaivel, musters uschè divers sco ch'ins po, ch'i saja fritga cotga, bulieus setgents conservads en aschieu u ieli, verduras en vaider, victualias cundidas per baccunets dultschas u ensaladas – pli differentes ch'ils recepts èn, e pli ritga che la raccolta en il museum vegn. Las vivondas e lur preparaziun fascineschan Max Bottini dapi ditg. El ha dà en egl pliras giadas, cuschinond publicamain pulasters en terracotga u merluzs tenor recepts d'ina giada ed als mangiond lura en in banchet cun ils aspectaturs. Cun ses project «Vaiders da conservas» s'occupa'l cun ina maniera da tegnair en salv aliments che serva per tutta sort vivondas, saja quai fritga, bulieus, charn, pesch u ievs. La varietad da cumbinaziuns nun ha bunamain nagin cunfin; i dat tschients da recepts, da las schniclas da paira tradiziunalas a las cucumeras cuminas en aschieu, la fritga en rum cun zutger u la zitga cun vaniglia e mandlas.

Far part e gustar

Cun ses project vul Max Bottini rimnar uschè blers vaiders da conservas sco ch'ins po, cun cuntegns uschè divers sco pussaivel, per cumponer ina sort orgla giganta per il palat en il tschaler da la chartusa veglia. Dals 5 da november 2000 fin als 25 da favrer 2001 na preschenta'l be il bel aspect da las vivondas conservadas, anzi, ins po giudair lur varietad era las gustond. Il museum, en sasez mania per guardar, sa transfurma uschia en in lieu per il palat. Plinavant vegnan ils recepts documentads e rimnads per stgaffir üna collecziun museala insolita. Ins po far part da lez project extraordinari. Ittingen tschertga recepts per conservar vivondas, sajan els convenziunals e tradiziunals, dal temp da nossas tattas, u creaziuns novas, stravagantas ed excepziunalas. Ins sto be s'annunziar fin als 15 da settember 2000, precisond il dumber probabel da vaiders ch'ins vul metter a disposiziun e descrivend curtamain il recept correspondent.

Adressa: Kunstmuseum des Kantons Thurgau, Kartause Ittingen, 8532 Warth. Telefon: 052 748 41 20. Telefax: 052 740 01 10. Posta elettronica: kunstmuseum.thurgau@bluewin.ch